

摘藻堂四庫全書薈要

集部

欽定四庫全書薈要卷一萬九千四百一

集部

皇清文頴卷首二十四

御製詩

五言排律

御賜書經傳說彙纂恭紀二十二韻

帝治布寰瀛天心佑永清奉三宏建極得一允居貞禮
樂觀明備詩書悅性情石渠掄碩彥天祿聚羣英謂是
典謨語由來齊治程先朝曾纂輯今日重修明諸子收

精粹羣言費品評孔門傳伏氏漢代著康成自合抽絲
細非如聚訟爭紫陽經校定仲默幾研精多士承

明命儒臣殫惻誠午憲几上列乙夜案頭橫幾歲青藜
照逾時全璧呈奎文光有蔚

聖語奧難名非僅筌蹄得將俾天地平惠民符保赤卜
相法調羹佑起明良盛栽培宅俊宏千秋傳治典萬國
仰躬行喜荷縹緗

賜恩叨雨露榮臚陳明國是往復繹歌賡識淺難窺秘

心虔等捧盈從知文治化海宇慶同聲

九日講武恭紀

四海徧雍熙三秋閱虎羆代當全盛際節應大蒐時
日月中天麗旌旗曠野麾軍容森甲冑坳牧物黃驪
爽氣浮仙仗卿雲映

御帷虎賁爭蹻蹻戎御盡師師拂劍霜華動彎弓月影
披馬嘶黃菊野鷹過白雲陞組練生光焰衡鑣中式儀
九宮羅畫戟六甲載雲旗舞鏑遊絲裊穿正閃電馳古

來歌七德今日炳重離

聖治輝千載

天威震四夷

鑾輿歸紫極扈從詠周詩

闕里祭器新成

賜觀簠簋鉶登豆爵六色恭紀八韻

代啓文明炳崇儒

聖道光

皇心欽日月禮器備宮牆舊譜稽成式新圖發尚方斑
斕紛有耀簠簋列成行

頒示來三殿傳觀遍兩庠涵光呈玉質絢彩燦金相萬
國同文軌千秋肅典常從茲先後聖一揆頌吾

皇

石髮

帶縷浮春碧漪漪貼石初隨波翻髻亂依藻漾流舒綠
水供朝沐輕風當晚梳影窺慚浴鷺絲蔓礙游魚鏡裏

青春永仙家甘露虛何須嘆霜鬢即此萬年餘

恭奉

皇太后恭謁

孝陵

景陵敬成長律

扈蹕馳千騎鳴鸞駕六飛紹先思

祖德色養奉

慈闈爽氣催征轡霜花散曉暉有秋歡里巷鼓腹遍郊

圻松栢森元路雲霞護玉衣
鬯圭承凜凜

冠劍仰依依言念開千古
憂勤萃萬幾維清欽陟降
瞻拜重獻歎

南苑大閱謁元靈宮宮是

皇曾祖世祖章皇帝建也敬依

皇祖聖祖仁皇帝韻以誌敬仰之忱時冬至月朔日

閱狩金輿駕鳴騶赤羽翔千官
分鷺序萬姓仰龍光雪積平原
白泥鋪御道黃翠華來別苑初
地散天香杳靄雲

生路蕭森松泛涼星辰圍斗宿丁甲護虹梁屏念瞻瑤
殿虔心禮素王若臨欽在上作極愧惟皇祇以紹
庭切何能與物昌律身懷監史敷化體

穹蒼文德猶慙未武功不敢忘菟苗遵古制逸豫戒禽
荒簇簇雲屯盛悠悠霧旆颺一陽初應律三白已呈祥
漸覺條風扇新添麗日長覲揚吾未逮布治願平康

庚申仲秋丁祭

先師孔子

法

祖恢文德崇儒禮

素王晨光開輦路露氣浥旗常寅祀心恒凜丁辰日正
陽皇皇陳禮樂肅肅對宮牆言念百王後身登
夫子堂君師誠有愧仰止志方長

恭閱

太祖

太宗

世祖

聖祖

世宗實錄聖訓告成敬紀五言排律二十四韻

豐沛貽謀遠

天人應德同明綱方掃地

帝顧實維東用淨橈槍氣徐開闔闔風庥凝

皇有極德厚

祚無窮開創駕千古驅除僅一戎三韓恢舊業萬國仰

重瞳爰布明堂令方吹解谷筒順時敷巽命馭物凜
乾衷往者滇南亂曾煩八陣攻運籌盡伊呂奮力總羆熊
奏捷憑邊將

頌恩自法宮平成歌

聖德熙皞戴

神功道洽陰陽序時清禮樂崇詩書延俊秀

恩澤被昆蟲茹拔交成泰芒銷象應豐戎行甲沾酒村
婦乳孳童六十一年久

皇王帝治隆春秋旋氣運張弛協

蒼穹日昃猶

勤政民安更省

躬懽呼遍白叟聲教屆烏蒙緬想承

光烈端維予幼冲紹

庭勵初志推斗賴羣工成憲猶堪鑒孚誠或可通永言
欽

陟降勝似拜崆峒

辛酉仲春耕藉

布政宜敦本當春乃勸農
良辰耕帝藉膏雨遍畿封輦
路華旌映城闔瑞靄濃

明禋先致享

神格益滋恭耒耜青箱列公卿
法服從三推親竟畝百室願如墉

皇考貽謨烈齋宮著肅雍無須陳
夏諺即此仰堯蹤
三秋時序萬寶告成命駕出口巡狩導

祖制也經過州縣百姓扶老携幼歡呼夾路閭閻之間
戶有蓋藏場多種穗穗深愜朕志爰下詔蠲免田
租以示嘉惠元元之意

武備由來重時巡意更深當秋排法駕豫日足甘霖旭
耀旌旗影風傳鼓角音停鑾問農事獻曝見民心戶有
倉箱積人多樂豫吟輿情猶似昔

祖德到于今解澤心無吝紹

庭志倍欽茲行當黽勉詎止為從禽

常山峪行宮

憶昔髫齡際趨陪

聖祖前於今巡幸至駐蹕故宮邊湛露曾叨澤含飴想
侍

筵秋風悲此日軒屋尚當年鳥語如懷舊花香故逞妍
恩勤終古慕承顯一身肩

再疊前韻

經國猷垂後承家志繼前三秋修武備萬乘閱嚴邊勝

地停鑾御離宮啓玉筵欣逢無事日喜覩有秋年插笏
峰爭秀披圖景闢妍永懷

無競烈景仰懼難肩

至博羅河屯四十八旗諸蒙古王等來接

天恩歌有歲

祖澤賴無窮巡狩三秋日趨承萬里風歡聲毳帳合佳
氣慢城通來享同遐邇咸賓混外中誠輸陳厥篚燕賜
詠敦弓永念覃敷慶懷柔倍惕衷

散館試庶吉士賦得春蠶作繭

得咸字

蠶事當春月辛勤婦女咸候時鳩上下入戶燕呢喃松
火燃村舍條桑採谷巖浴川身乍潔食葉口方饒起箔
新蛾長承筐素手摻三眠類慵懶入繭似封緘漫比抽
思巧堪知為政凡新絲還待賣慙愧著袍衫

賦得望雲思雪意

同雲方出谷釀雪欲漫空未辨瓊英白先藏羲御紅流
恩歸橐籥協氣漸冲融潤逼梧堦側香回梅塢中停驂

祝屏翳節玉候豐隆望裏寒原肅祈年願不窮

賜江南總督尹繼善之任

淮沛今何似災餘不忍言邇來闕二黼誰與辦三殮敢
靳司農帑還祈大造恩當春應舉趾積潦尚留痕民瘼
遐觀在心憂夢想存勉伊經畫策為我活黎元

雨

和氣當春洽甘膏傍晚零初飄千點白乍失萬峰青妙
洗桃心膩平添杏蕊馨新疇渾可望疎竹却宜聽生意

資沾漑烟容接窅冥漲痕侵碧沼綻萼照紅櫺樂豈緣
花圃情應寄麥町欣承明賜溥惕若對圓靈

賦得折檻旌直臣

五言排律八韻得交
字試翰詹諸臣題

玉繩低鶴禁朱鳥煥螭坳鸞扇非烟散鴛班委珮敲佞
臣方唯唯直士獨嘒嘒自具松筠操難容涇渭淆撓龍
鱗豈怯折鹿角曾摎奚用檻重輯還同罟不拋納忠餘
宿將介節嘆征茅企想都俞世盈廷喜泰交

夏至齋居即事

黼衣遷常座明堂闔左扉撫辰懷嬪代勅命凜時幾北
陸將依晷南薰漫叶徽蕩暄風習習燭鬱旭暉暉齋處
封章少遙聞晝漏稀敢期誠意假因驗道心微

避暑山莊爲

皇祖臨幸最愛之地亦孫臣受

恩特深處也八年秋謁

陵便道駐蹕數日曷勝今昔之感詩以誌弗忘云

軒墀敬

御園草樹靜高原遊豫思

仁祖庥和逮孝孫

橋山將酹爵玉館此停轅
罨畫山容在修蛇電影奔
禽言欣客至蛩語訴秋繁
堦篆苔紋暗碑詩釵腳存

聖踪猶可想衷曲向誰論
倍切乾乾志虞孤
覆載恩

靜夜讀書

虎帳無多暇書林趣轉嘉
研精當夜靜息慮忘塵譁
別

是中秋景依然舊月華陳編同汲綆精義喻披砂燄結
銀檠燭香生玉椀茶何須吟出塞四海久為家

興京

姬室于豳日炎劉起沛時

一人方締造四海遂為基皇澗猶然在臯門尚可思屏
藩堪示固宮室不言卑往者爭雄際同歸

出衆姿秋風經故國膏雨遍新陂父老迎鑾馭材官衛
羽旗初來猶切切欲去更遲遲言念

皇圖纘端維

厚德垂凜乎同御朽告我後人知

過廣寧望醫巫閭山恭依

皇祖聖祖仁皇帝元韻

海旭凝螺黛罡風削玉蓉靈竒經覽乍

聖蹟躡尋重過客羣停轡仙人迥矗峰

是山有仙人巖
桃花洞聖水盆

北鎮廟諸竒勝徒思山側徑未撫寺前松萬古為幽鎮千秋溯

舜封崇功標地紀秩祀偶天宗截薛疑騫鳳嶢峘突遶

龍盈眸欣積素步馬遲婁胸

山海關恭依

皇祖聖祖仁皇帝元韻

取豫嚴扃鑰思蒙拓海邊耕桑三輔接形勝兩京連羽
衛初冬度期門曉漏傳

橋山瞻此日

龍步想當年列巘餘晴雪遙林散曙烟迎眸渾似畫撫
序正為權事異九封谷心期舟濟川拳拳思在德大訓

更昭然

在德誠非易臨風更慨然
皇祖詩句也

澄海樓聯句

乾隆八年十月十六日自盛京歲事還京道入渝關
登澄海樓望海雪霽千峰波明萬頃天容海色洵屬
奇觀時張照梁詩正侍從因與聯句凡字畫涉水部
者概不用仿歐陽修咏雪禁體也

御製

康回昔憑怒使地東南傾太始本無始

常盈是不盈雙丸出其裏元氣鼓為營崑嶼藐拳

石

臣張照

御軒樓敞繡甍龍窻疑貝闕彷彿見瑤京鞭石橋終斷

噓烟市乍更星槎何處轉鰲柱若為擎邈矣端倪

豁

臣梁詩正

御雄哉氣象崢嶸禹功思四載秦業剝孤城萬壑朝宗此

織珠茹納并由來無寸土亘古只空明直上到天

險

臣張照

御橫陳據地張目迷光晶皓耳駭聲砰轟精衛填難盡

長虹駕可成三壺遠紫帶重疊銷飛鯨賦羨木華

博

臣梁
詩正

製吟推玉局英平鋪歷劫雪喜遇初冬晴望歎曾聞若
來遊誰逐靖內光含煜煜陰火涼熒熒絕域隨風

達

臣張
照

御方諸應月呈坎重不失信天一乃居貞比樂韶觀止

如山聖景行空傳香象踏謬執窄蟲評有以謙能

受

臣梁
詩正

御虛將白自生苞
乾恢度量吐日煥
晶瑩永奠寰區宴
仙鄉底問程

秋日奉

皇太后遊玉泉山周覽西海近郊獲事即景賦詩十四

韻

降豐欣此日行令及茲辰

香輦周田陌嘉禾滿鹿囷
千官承罕畢二黼切咨詢

堯舜應誇宋

宋宣仁太后人
稱女中堯舜

風詩或比豳
繫予德菲薄

懿教勉遵循忝在士民上能忘飢溺親逢年

慈願洽愛日永懷申別館晴霞際仙槎野水濱鶴容千
歲古菊酒一樽醇錦障排丹樹紗疏面碧岫無央鸞鳳
隊極樂

靜常身雲寫波中影山留畫裏真忘言祛俗遠即景得
題新處處陪

歡豫秋光總是春

乾隆九年十月重葺翰林院落成車駕臨幸錫宴

送大學士掌院事鄂爾泰張廷玉進署以張說
東壁圖書府五律字為韻賦東字音字二首勅
諸臣各分一字賦詩

撫序權居北占星壁在東斯干歌翰苑於樂鬯儒風改
殿當年異登瀛此日同三台司道筦二老亮天功樂具
卿雲奏筵開湛露融底希光舊史長此贊微躬

木天臨翠輦鴛侶集華簪廣學心常切因文道可尋橫
汾陰豈昔來泮水猶今禮樂於焉盛觥罍取次斟詩慙

得珍字辭喜獻官箴返轡重城暮猶聞歌誦音

觀象臺

奉若欽

維顯研幾凜日明瑤樞調律紀珠貫驗

天行翠輦臨黃道星臺據月城渾儀觀建象神器惕持
盈命義仲和叔在璿璣玉衡授時熙庶績敢恃泰階平

七言排律

辛亥仲春

上幸豐澤園演耕藉禮

上躬四推

命臣等終畝恭擬應制十韻

大地陽和淑景韶
潛蘇土脉應風條
鴻鈞普扇百昌序
大造均舒萬物調

翠輦臨耕旗閃爍

金輿載駕玉鏤雕
行行西苑停鑾輅
泛泛天池盪畫橈
帝耒四推膏壤沃

皇躬一塹甫田遙先期已見寅恭懋終畝還思教澤饒
種布期生連理穗壠開願長九岐苗追思

聖祖觀耕地却值吾

皇演禮朝豐稔歲功九有遍太和景象萬方昭放勲久
頌

堯功茂協帝重瞻

舜德超

賦得山雞舞鏡

七言排律十
二韻得山字

名禽聞說來荆國舞向菱花意轉嫵寶匣乍開看皎潔
雕櫳初對訝攔端婆娑應節疑張錦嬈娜含姿半鞦髻
小折腰時文綬亂大垂手處絳綃殷光懸桂窟虛堂畔
綵綯霓裳夕照間顧步多應憐藻耀呼朋好試語間關
詎同鷗鳥羣驚客却比佳人自惜顏雲翼罷梳還獨立
星眸回盼許雙攀一奩水月平分影幾隊鷓鴣共接班
只爲空明矜矯翅便教飲啄忘棲山風翻翠帶簷枝亞
春暖重茵砌蘚斑欲擬當前誇綽約可知箇裏本舒閒

謁

陵禮畢車駕入盛京得七言排律十四韻

羣山萬壑總朝東王氣為龍鎮鬱蔥白水壽丘名不減
作豐遷鎬事應同

當時提劍安黔首此日垂衣逮藐躬延佇關山千里外
每懷瞻拜八年中商颶送爽清馳道疊嶂排青列遠空
上將隨車金麗殺名王執轡玉璫瓏行宮視膳邀
慈豫故國旋輿仰

祖功只為上

陵思馬鬣豈緣校獵賦車攻六飛因幸興王里百辟咸
朝慶善宮訝許稱觴來故老不教警蹕駭新豐葛燈綃
帳猶餘儉執豕酌匏許獻衷華曜景中鸞扇動若非烟
裏鴨香融孕虞育夏

天心眷篤祐依京

帝謂通萬禩

皇清綿寶祚扶桑初日海門紅

五言絕句

裁衣寄從軍者四首

玉關天氣涼六月已飛霜
驚理篋中素寄與遠行郎
長短尚如初寬窄想非舊
那堪孤燈下縫紉聽寒漏
中庭度金風絨刀著手冷
歎息厚裝綿行將寄雪嶺
裁衣何所願願郎早樹勲
郎為萬戶侯妾作郡夫人
平湖雨渡四首

一隄楊柳樹數里白蓮花
細雨霏霏處輕舟泛若耶

烟雲暗遠天獨坐孤篷裏颯然風滿湖衣履皆寒水
細雨滿湖秋扁舟泛碧流平分詩景去恰有一羣鷗
掛帆風力健不須盪雙櫓遙望翠微峰濛濛亂烟雨

古意四首

春老金條脫塵生玉鏡臺分明陌頭望不自陌頭來
明月入高樓上有綽約人只見樓中秋誰知樓外春
熏爐炷水沉拜月衣裳冷拜起步階陰桂香弄寒影
青青楊柳枝淡淡和風吹忽見一枝折無情復阿誰

問春風

藉爾催春蕊無勞妬艷枝
入園應檢點莫使一般吹
春風答

吹萬本無心更番豈有意
一需一疾間為風誠不易
鳴玉瀨四首

無風松謖謖有月金縱縱
玉女洗頭盆瀉作芙蓉江
林麓自瀟灑烟嵐多變態
飛流下十尋蒼然玉珠碎
長虹飲素練圓潭澄見底
時來聽清泠塵念一以洗

澗壑誠沃漭松篁復蕭颯把筆坐石頭林泉相問答

常山峪行宮八景八首

綠樾徑

灌木盤山腰濃陰日翳翳豁開壺中天迥異人間世

虛白軒

虛室能生白一氣常函三閒情空外寄妙道箇中叅

青雲梯

青雲信有梯丹崖暫延佇鹿豕出翠微逢迎務光侶

楓香阪

清吟步修阪衣袂泛秋涼
金風颯然過微聞山楓香

蔚藻堂

花木暢生意大地蔚菁藻
忘言入靜觀忻然愜懷抱

如是室

如是如是室坐對清秋山
遊山室中人不費往與還

翠風埭

野木不知名雨後增新翠
誰云塞北山却有江南致

凌霞亭

危亭構峰頂面面青嶺岬踏石片雲飛去作天邊霞

玉泉六首

玉泉此為源泉源豈即此試問所從來只此一勺水

玉名玉豈真泉名玉尤幻而我對玉泉如是幻真玩
石髓澄堪漱烟蘿綠可捫雨後溪流急山根帶漲痕
暴漲退亦急垂柳絲餘濕惟茲有本泉終古長溱溱
潺溪愜靜聆清泚供幽眺心與境俱適何必蘇門嘯

趵突聲猶狀匡廬匪當對垂虹舊傳名吁嗟耳食輩

玉泉

蓋趵突也非如香爐瀑布可以垂虹比擬舊為八景之一蓋昔人未至此地想像名之者然靈源獨涌瀾澗攸資則信帝京佳勝也

六言絕句

恭題鳳仙石竹畫冊二首

冷露暗滋秋草著花紅紫成堆小鳳貪餐竹實合教一處同開

絡緯送秋聲至蜻蜒弄影風涼幽卉一叢舒艷都來石

卷二十四
畔尋香

七言絕句

將獵南苑檢點所携書籍

天高秋氣肅郊坰南苑將除信宿停
檢點行旒整書籍
不因校獵廢談經

三月十三日隨

皇父駕幸圓明園五首

春園初見百花開日午欣隨

御輦來纈錦蒸霞呈麗景東皇雨露好栽培

最是蓬萊浩蕩春東風如剪物華新裙腰草合平於毯
滑笏溪流色似銀

邇來甘雨潤苗新走馬天街絕點塵試策金鞭回望處
翠條如染拂行人

黃繖當中映午暎

太平天子幸春園靈臺靈沼同民樂夾道齊呼萬歲尊
御爐香暖惠風晴日映墀頭喚上卿不是物華供玩少

殿顏勤政意分明

柳溪垂釣

傍岸青青一帶遙
玻璃鏡淨拂烟條
持竿不為貪鱸膾
天水空明萬慮消

從軍行五首

三邊烽火照軍營
十萬丁男夜練兵
但使腰間懸寶劍
丈夫何處不成名

辭家萬里路迢迢
龍虎軍中夜擊刁
底事成功如約早

將軍聞是霍嫖姚

夜戰洮河馬不嘶無邊殺氣與雲齊
偷閒一枕金戈臥半是人膏半是泥

二十三番月缺盈君王恩重致身輕
轅門試射誰穿的十萬軍中最有名

成兒約計看刀環對鏡新驚髮半斑
不是親擒生頡利何顏復進玉門關

冒雨尋菊二首

秋雨霏霏碧蘚滋閒情今日步東籬不知冷夜寒朝裏
開到西風第幾枝

我愛秋來菊蕊開天工偏為洗塵埃倚欄閒咏衣衫濕
應是纔從籬畔回

村墟夜春二首

霜落園林時屆冬稻梁全穫罷三農田家作苦無休息
更聽村墟半夜春

萬籟全收夜已分寒春聲急隔窓聞高齋識得豐年景

篆裊爐香獨自焚

盆魚二首

圓池蓄水不須寬
依藻文魚自覺安
待到夜深微雨滴
跳波還似躍層瀾

綠荇青萍可避陰
一泓滿貯足浮沉
箇中也有相忘樂
不羨滄浪萬丈深

題元祐黨人碑

元祐清流號濁流
黨人鐫石石遺羞
祇今欲補名臣傳

猶喜殘碑姓氏留

過淋河

憑催詩思客途過
得得輕蹄踏嫩莎
拂面春風三十里
一灣新碧小淋河

夏日書懷

宮柳陰濃殿閣深
冰幙不受暑來侵
南風未解吾民愠
慙愧蒼生愛戴心

秋日奉

皇太后駕幸南苑即事六首

虞人建幟甸人隨南苑秋清好獵時
閱武此來兼省歛
香風餅餌拂旌旗

萬物熙和人造中郊原輝映苑門紅
承

歡仰識

慈顏豫祇為

天恩錫屢豐

羽衛森翹出帝城
順時清蹕此巡行
金吾底事頻傳警

便欲周知閭巷情

扈從長承

愛日暉五雲高捧鳳輿翬問

安戶外親調膳手射郊原鹿正肥

離宮月影透書窗法曲時聞畫鼓撝題柱吟餘思往事
不知絳蠟地銀釭

從來稽古戒禽荒宵旰勤勞敢刻忘懽樂正饒還止輦
屬車侍從有東方

郊外即事三首

三秋野景寥天迥一抹斜陽晚照明最是豐年饒氣象
村村社鼓慶西成

霜落平原好合圍無心從獸玉鞭揮愛觀富有千村景
兩字探原食與衣

郊圻犬吠雜雞號策馬霜華點素袍收穫纔完仍播麥
田家四季總勤勞

山田三首

禾黍芄芃遍嶺巔
停鞭欣看有秋年
版圖可識同遐邇
塞外荒山盡闢田

高原宜黍稻宜低
物土耕桑塞外齊
茶幔酒旗山抱塢
軟沙濕草水鳴溪

舊代長愁烽火驚
於今此地有人耕
混同中外皆天澤
倍切乾乾保泰情

灤河捕魚二首

野灘片片起鴛鴦
盪漿中流樂意多
髣髴江鄉三月景

西風紅葉小灤河

灤河水自上都流順水行如風送舟最是關仝得意筆
蒼山野渡正初秋

出塞雜咏九首

雕輿繡羽颯金風曉發都城旭影紅十部簫韶翻似海
三千車騎氣如虹

邊關峰色翠芙蓉萬古隄防笑祖龍守德由來勝守險
金湯禮義是提封

靜夜離宮月在窗獨裁章奏地金缸鴈鳴遠浦傳霜信
人過孤村引吠尨

極北山高近紫微片雲常作雪霏霏黃羊白鹿鋪平野
好試今秋第一圍

龍沙八月似冬初獻賦長楊滿屬車最愛楓林新似染
折來題句手親書

鐵騎番兒鴈字排霜鋒掌樣淨磨揩新豐空有如澠酒
辜負當年白鼻騮

平明雨洗屬車塵
蹠蹠驂騑稱意馴
濯濯烟鬟看黛重
萋萋麥壠愛青新

青兕黃牛滿澤原
欣看天餉助歸轅
戍兒夜半吹羌笛
此日春風度玉門

時巡詎止閱邊關
喜見年豐一解顏
搖颺翠華佳氣滿
都中爭道六龍還

北郊禮畢回圓明園道中作四首

薰風應律調元化
膏雨知時利夏耕
不獨公田霑渥澤

一花一木總敷榮

繒燎光中葆吹聞迴瞻黃幄瑞氤氲機街步出仙韶引
槐柳陰濃綠似雲

黃繖朱旂鳳甸隈屬車劍佩有鄒枚天公賜與迎梅景
繡陌青蔥絕點埃

垂楊十里窰青絲警蹕聲中駕六飛最愛霑衣朝氣潤
輕雲猶作雨霏霏

射獵南苑卽事六首

韎韐橐鞬列羽林當秋文園偶經臨承平詎肯忘戎事
萬戶饑寒更惕心

翼翼堆場皆早秣纍纍懸架足秋壺幽風底用丹青筆
十里烟郊入畫圖

壯紅門裏仲秋天爽氣游絲拂錦韉行過鴈橋人似畫
踏來芳甸草如烟

南苑宜秋宜獵時禾香風滿赤鸞旗少年熟讀相如疏
每至歡娛鑒在茲

榆槐黃染野花殷策渡時過水一灣千朶青蓮萬章錦
却教人憶塞中山

省耕省歛古曾聞望處西成意亦欣漫把豐年容易看
幾多憂慮塵宵分

春水泛舟

綠浸樓臺水底明春湖初試一舸輕誰云鷗鳥無心者
也向汀洲續舊盟

清明後一日漫作二首

湖山佳致暖烟饒
稚綠嫣紅態鬪嬌
看罷紙鳶嘗過酪
閒吟準備送春朝

東風吹綻含胎蕊
喜攬芳華入吟裏
溪畔刺舟還悵然
已有落花貼流水

郊行三首

蒼尚青青黍欲黃
金風時送粥餠香
翠華搖曳纖塵淨
歡切郊行十里強

野老扶兒望六飛
停鞭問處話依依
金吾莫謾頻呼蹕

一向籌伊凍與飢

滑笏溪流曲抱村遊絲白日靜秋原村翁不識鑾輿過
跣足科頭倚葦門

塞上行五首

昔年今日此龍沙中外情聯久一家幾處荒荆餘敗壘
千秋興廢繫懷賒

露浥烟蕪欲作霜午衣猶熱曉衣涼皇州此際殘蟬咽
已見南飛鴈一行

馬足馳馱踏馬鞍迴看天外矗槍竿山靈有問如何答
前歲詩盟未敢寒

丹楓翠柏妙山容野墅溪村也間逢最是牧羊估馬客
于今都識重良農

葆吹聲聲傍晚撻檀廬倚咏剪銀釭春風已度榆關外
漫唱涼州水調腔

臘月二十一日立春擬春帖子三首

臘鼓撻撻奏雅寅不須入日始成人
盧仝人日立春詩
今朝方始覺成人

金屏玉帖迎青令甲子中元第一春

銅渾欽驗八風調喜綻宮梅白玉條更進詞臣春帖子
筆花飛處總含韶

圓蓋推遷信有靈璇杓德晷已移星今年詩卷增顏色
兩度紅牋咏始青

春日郊行雜咏八首

易水東頭涑水西寒蕪遠樹總淒迷馬知人意歸蹄懶
一片白雲山與齊

山村水郭灑然清不必前途借問程
古寺閉門無客叩
春田經雨有人耕

遠峰層疊矗新螺點點牛羊恣寢訛
扶杖老翁中社酒
東阡歸路醉顏酡

柳色遙黃近尚無拂春著意幾株株
溪橋一帶房山路
最似詩中西子湖

花朝前後景可憐花心柳眼爭新鮮
兒童底把春光趲
未至清明放紙鳶

我聞潭柘祇園美初到原如久住人却笑闍黎無好句
頻翻貝葉說根塵

韶麗風光二月時新晴最可雨尤宜看耕不覺遲歸轡
西日銅鉦拂綵旗

掩映耕雲種雨家金吾行處不教諱幽風圖畫誰傳得
海子門西十里斜

雲罩寺留題三首

訝底層雲不盪胸山靈為我闢雲封開窓四面延奇趣

萬疊屏風削玉蓉

高入天風顙萬尋登臨信可散幽襟
常時畫裏遙觀處獨據匡牀自在吟

林霧谿嵐眼底浮風鈴語我少淹留
非闕勝處誇新句祇恐荒唐負此遊

皇清文頴卷首二十四



總校官庶吉士 臣張能照

校對官修撰 臣張書勲

謄錄監生 臣蔣大鎔

欽定四庫全書薈要

集部

皇清文穎卷二

詳校官候選知縣臣吳甸華



欽定四庫全書薈要卷一萬九千四百二

集部

皇清文穎卷一

表

恭進易經叅解表

張英



至道開於河洛發義文周孔之微言

奧旨貫乎陰陽備彖象卦爻之精義叅稽訓詁託藜火
而重編側近

光華食野芹而思獻俯慙譴劣彌切冰兢茲蓋伏遇

皇帝陛下

道法天行不息

學同日進無疆尚書已講於

經幃大易繼陳於

黼座神凝簡冊

聖心探一畫之先博極圖疇

睿照啓千齡之秘臣叨恩於禁籞祇奉

欽明竊有志於韋編欲窺象數自田何京房而後漢初
各有師傳逮濂洛康節以來宋儒始為定論考亭本義
之學洵可奉為宗風伊川易傳之文尤有資於治理竊
惟廣且大者易之體豈容驟測其精微奇而法者易之
辭未許遽窺其典要必在發明章句譬如探源者先索
其流務期剖晰文詞難言得意者遂忘其象爰考先賢
諸說輯為叅解一書時逾兩期卷分六帙如涉滄海而
尋畔岸祇堪自砭其愚頑竊仰泰岱而竭塵埃詎謂有

裨於

高厚但念閱寒歷暑分細旃廣廈之餘閒浥露研朱居
秘閣芸香之勝地雖極知其蕪陋敢不冒為敷陳聊佐
乙夜之覽觀庶備

九重之清燕伏願

德符岐聖

治軼義皇

履帝位而豐豫時登

養萬民而訟師不作觀損益之義化自洽於中孚察消
長之幾世自升於大有對時育物端居見天地之心知
崇禮卑撫卷盡乾坤之蘊矣為此具本謹稱

進以

聞

恩賜宮紗謝表

張英

康熙二十一年五月十四日蒙

恩賜紗二端命編修臣杜訥賁付臣廷瓚送回江南臣

恭設香案領訖望

闕九叩首謹奉表稱謝者伏以故里初歸驚沐

殊恩於天上

聖慈垂顧遠分渥澤於田間展霧縠之輕華涼生華戶
披香羅之璀璨風滿衡門叨異數而增慙撫愚衷而倍

惕恭惟

皇帝陛下

德配神堯

勤嬪大禹

文教彰而六經啓蘊

武功偃而九服來同簡儒臣於禁中置講僚於座右

臣

猥以百生之竒遇際千載之昌期握筠管而侍彤闈抱
芸編而趨紫闥備沾優渥曲賜矜容迺以銜土私情冒

干

宸聽復荷如天

聖度俯鑒微悰
頒文綺於尚方
錫精鏐於內府
龍顏宣室捧忠孝之

綸音馬首東郊拜平安之

天語感深欲涕
寵至彌驚自謝
直廬遂遵河渚
雲深日近瞻冀
北而懷思水洄
沙淤望江南而
莫達朝沿柳岸
心依黼席之前
夜泊漁磯夢繞
金鋪之側逾四
閱月始

抵鄉園適蓬蒿初返之時正綺縠遙頒之日榮生里巷
爭識

聖朝禮下之隆喜溢親知共指微臣稽古之賜冰蠶麗
質當暑彌清雪繭輕綃臨風欲舉爰選金鍼玉尺花鳥
新裁還同紫綺珍裘龍香什襲伏念自膳服叨於禁近
如臣之被寵者獨深迨頒賚及於家居似臣之蒙恩者
益少欽承匪懈悚惕靡寧臣又伏思

恩命由於內廷未敢繕疏稱謝遂使瞻依片念徒然自

結於衡茅感激微衷無由上徹於

君父輾轉宵旦難以即安敬藉同官肅陳謝悃望層霄而虎拜猶如身侍紅雲處下里而蛩吟敢冀詞聞

丹陛伏願

聖躬純嘏

帝治龐鴻俗厚年豐民安物阜臣雖暫棲數澤光華近

戴堯天遠在江湖熙皞常依舜日臣愚不勝悚惶戰慄之至謹奉表稱

謝以

聞

恩賜羊酒食物謝表

張英

康熙二十二年十二月二十三日蒙

恩賜臣英羊二牽酒二罇鹿一雉八鮮魚鹿尾各六給
付臣男翰林院編修臣廷瓚臣望

闕九叩首謹奉表稱謝者伏以

恩從天上蓬茅沾玉露而增榮春到江南枯蠹沐瓊膏
而起色憶昔囊書

深殿每分暉於伏臘之時詎意卧疾空山復拜賜於嘉

平之節澤愈徵其優渥感自倍於恒常恭惟

皇帝陛下

文治光華

武功赫濯

運睿慮於穆清之上措邦家於磐石之安仁浹生民薄
征徭而誦聲在野義孚藩服韜戈甲而譯使來庭近者
紀

聖略於球圖昭回千禩煥

天章於雲漢炳耀六經宏猷允駕乎昔王芳軌迴超夫
前代臣英葑菲薄植荷

簡拔於昌時樛櫟微材隨步趨於

經幄恩深十載寵溢多生仰瞻

聖學高深獲覩

宸衷勤毖玉階待曙早看三殿燈輝金鑰傳聲夜聽九
門漏徹層霄清切異數駢蕃翠釜銀罍常飽調蘭之饌
珍裘紫綺還裁疊雪之衣錦雉分自

御圍良驥頒從

內廐春風簾幙宮櫻堆赤玉之盤秋水蕙葭河鯉出珊瑚之網每當除歲宮使早叩衡門羅列尚方珍味懽騰穉子庖登仙獸竈發天香歷數殊榮皆成盛事臣英未有涓埃愚悃報

聖澤之帡幪猥以草土私情違

天顏於咫尺粉榆暫返寒暑再更聽紫陌之雞聲近移茅舍盼觚稜之日影遠到田間雖負土之情少酌顧復

而采薪之疾益覺纏綿蓋桐以心虛未霜而落柳因質
弱望秋而衰身雖襦於漁樵念舊

恩而倍悚夢常依於

君父欲奮飛而未能乃上厘

睿懷垂注無殊曩昔近當令序流膏特畀幽遐爰開白
獸之樽用勵羔羊之素嘉魚貢於遼海瑞鹿致自關山
昔忝詞曹故有文禽之錫近棲山澤并分野雉之珍計
頒賚於

內廷正當雪候迨郵傳於寒谷恰值春溫

宸眷彌殷

臣

衷益愧乍聞而心惕永念而涕零思

臣舊

侍

彤闈惟切曠療之懼自離

紫闥久無夙夜之勞

臣

父得奉

龍章典禮貺嘉於泉壤

臣

英屢承

天語德音遙下於江湖

臣

雖糜頂踵之微茫而無能醺

生成之萬一者也伏願

景祐日升

聖功時懋俗登三古治冠百王臣雖結伴山農同為擊

壤

堯衢之侶倘得捐除宿疾再侍賡歌

舜日之班臣不勝惶悚之至謹奉表稱

謝以

聞

欽定四庫全書

卷一

恭進

聖德萬壽詩表

陳廷敬

伏以

德並乾行純嘏允符函蓋

光齊日照遐齡永配曦輪欣逢景運之昌慶洽承平之
盛陽春發育喜萬彙之蒙庥化育和恒詠九如而獻祝
臣陳廷敬誠懽誠忭稽首頓首上言洪惟我

皇上貞符誕握寶籙弘膺居正體元備聖人之全德履

仁蹈義躋天下於咸寧有生民未有之奇道隆三古兼
前代未兼之業功蓋百王文命敷而風教式於九圍武
烈昭而聲靈振乎八極既高蕩蕩巍巍之績復溥穹穹
厚厚之恩偕闔澤於神人徧謳歌於中外蓋以肇天極
而修人紀用是闡

皇綱而恢

帝紘昔當初臨

寶祚之時正是孝事

慈寧之日

重聞問以為君何欲我

皇答曰圖治愛民曾傳

聖語於當年言為經而辭為緯果見太平於今日治已
定而功已成猶思由後以視今每念謹終其如始廓明
德新民之量廣錫類不匱之原存心養性以達天主敬
立誠而體道

容儀清穆肅雍殫昭事之虔齋祓潔嚴享祀盡明禋之

實危微精一接統緒於勲華濂洛關閩會淵源於鄒魯
籤分甲乙探冊府之藏卷歷丹黃發圖疇之秘西清東
壁古今絕企夫

天章二典三謨前後允推夫

御製並虞廷之什義兼風雅之長超唐人之篇理取宋
儒之正冠六文而首出邁八體以遐標玩程頤即此是
學之言契神化於形聲之內愛公權心正筆正之語運
經綸於文字之中宮漏未移已布千言於紙上封章纔

罷早迴萬象於毫端貫乎百家而我學不厭遊於六藝而維

聖多能玉尺儀天溥博如天之大土圭候日昭明如日之新春蒐夏苗適修軍國之禮投戈講藝不忘弧矢之威凡此躬行心得之精微具見

帝德宸修之廣大奉

東朝之鼎養允矣孝慈操北斗之璣衡皇哉作述龍樓鳳閣光華朗暎

前星玉葉瑤枝芳馥長凝叢桂克勤克儉建昭代之儀
型是訓是行彰

皇家之法守體節用之指約省百倍於前朝弘益下之
規德澤頻施於萬姓惜金錢於太府無非寬閭左征徭
減玉食於尚方正以裕民間積貯時頒渙汗蠲逋歲至
再三屢沛絲綸

賜免動逾千萬當爰書之覆奏必惻怛於

宸衷祥風轉草色於園扉協氣應星光於貫索夫自端

居燕寢無時不以黎庶為心至於問俗觀民隨在必以
補助為事

鑾車駕而需雲布慶翠旗指而解澤旁敷河淮為國計
攸關疏淪悉

聖謨所示山川永奠春回禹貢之區漕輓咸宜人樂我
朝之制良由無遠弗矚視萬里如目前以故靡舉不神
運天下於掌上在昔逆藩蠢動致勞

天討遐施一怒而安四海之民一舉而靖三方之亂彼

有元之餘裔曾負固於窮邊奮我武之維揚七旬弗侯
殄累朝之不逞彌月而平海不揚波郡縣盡臺灣之地
野無斥堠享王來域外之人迨喀爾喀歸依憐冒之中
迺噶爾丹自棄生成之外

神謀獨斷

廟算無遺朔漠三臨銘勒天山之表羽林大捷塵清瀚
海而遙慕義嚮風日出悉冠裳之會同文合軌月支皆
職貢之邦惟

聖主過化而存神故

王師有征而無戰所以行焉斯效動罔不臧總明目達
聰之休弘集思廣益之美自執河魁之柄

睿照遐周高披天鏡之光物情畢鑒規模弘遠令甲宣
昭轉輸通遼海之舟航水利興西北之農畝積倉平糶
以逮窮簷發粟截漕以蘇澤國郵傳用恤而

恩渥輿徒鰈稅是輕而

惠流商賈類宮壁水奉箴勸以欣榮魚服豹韜感投醪

而鼓勵仕循資格而立賢無方才許薦揚而用人惟己
時施仁於後世每致憫其嗣人念臣子末路之艱見覆
載兼容之大凡沾雨露思竭涓埃共荷帡幪罔酬高厚
今者懽呼遍於率土忭舞極夫含生雲燦星輝轉洪鈞
於一氣麟遊鳳集開

壽域於遐荒八千歲為春秋籌增太乙億萬年齊甲子
世躋華胥昔天保頌岡陵推誠受祿及豳風陳忠愛歸
嚮稱觥臣廷敬忝列侍從之班幸際雍熙之代伏覩

聖德廣運同歡

萬壽無疆謹獻詩十二首管窺蠡測而莫罄歌衢擊壤
以難名臣不任瞻

天仰

聖踴躍懼忤之至謹隨表恭進以

聞

欽定四庫全書

皇清文宗
卷一

恭進

聖武雅表

陳廷敬

臣伏見我

皇上撫御萬方盡有四海內外

恩德鴻龐聲教遐暨比年以來天下晏安而推溯武功
所由戡定則誅三逆以平滇黔粵閩楚蜀外闢察哈爾
臺灣倭羅斯喀爾喀之地幅幘之廣超越前古治化之
隆魏煥莫並今

神謀獨斷

聖武布昭伐罪救民

躬行天討大憝授首餘黨歸誠厄魯特全國蕩平捷書
至日雷動嵩呼中外臣工閭巷小民罔不歡欣忭慶蓋
是時

車駕親征馳驅戎壘凡三出朔塞矣當

天衷決策初御六師中朝悚慄僚庶攀留臣以年力就

衰蒙

恩矜念弗允扈從之請自是以來祇遵

成命不敢再瀆

天慈而違離

聖顏日夕虔惕伏念

皇上為天下掃除殘賊為邊疆永致廓清跋歷窮荒經
涉寒暑勤勞軍務旰食宵興而臣子安居略無寸効今
已無事言念

國恩無所報稱猶欲俯竭愚誠撰擬文句敬賜

聖烈之無窮而臣嬋鄙無學尋繹累日莫知所擇竊惟自古帝王有功於天下其名聲彰著於後世者方策之所記載金石之所刊錄聲詩之所流傳後之人覽其事而遐想其盛焉是以昭昭然若昨日事也然而稱極盛者亦不數數觀矣阪泉涿鹿以還古今號善用兵者漢之高帝唐之太宗皆自興事之始乘時邁會底於成功若我

皇上聖德而踐天位

躬居大寶志切生民仁育羣倫義正不諛尊臨九重制勝萬里

天威所至攻戰多方撲滅兇殘蕩掃巢窟宿寇遺孽一朝頓除伏廿載之逋誅樹九邊之壯觀殲其渠魁降其支黨燿烽永息亭堠不施曠古難平之部落盡為臣僕普天所有之土宇咸入版圖自此寰海清平兆民樂業集萬年之鴻慶成千古之大功臣仰窺

聖烈俯稽往古漢祖唐宗起於側陋角一時之雄乘末

流之敝雖精於兵事而我

皇上聖德神功文謨武烈實遠邁前徽矣若夫書冊所載既有天下優游宮禁之中不過遣將興師身居其逸坐收其效即間有親征如宋藝祖之北伐明成祖之行遼宋則失利明則鮮功是以方策金石聲詩之文彷彿儼比可導揚盛美之萬一者蓋徬徨震掉而莫知所擇焉求之於詩惟周宣王身為天子南征北伐有定天下之功雖淮夷諸小敵未為甚難平之寇而玁狁之伐止

於太原皆命臣士以行事蹟殊不類然其臣咏歌之詞
孔子有取焉唐臣柳宗元本其義作唐雅臣於嚮者滇
逆之平不度固陋竊取其義進平滇雅曾上塵

聖覽今臣伏思後世鐃歌鼓吹之曲未足以盡聖武之
形容仍依古體謹撰

大駕三臨沙漠

親平僭逆

聖武雅三篇繕錄以進臣之愚意固以敷宣人事之盛

美而其義則歸本於天我

皇上即天也覆載照臨雷霆風雨天之所以為道栽培
傾覆治亂侮亡

皇上之所以為功彼噶爾丹自外於覆載照臨之內干
雷霆之誅絕風雨之澤蓋所謂逆天者亡也我

皇上天威所臨賊始則沙場糜敗陣戮其孥衆叛親離
孤雛就縛其卒也我

皇上親揮將士迫抵賊巢賊知逆天必誅仰藥自殞逆

始訖終我

皇上馳驅萬里勞苦艱難若非

親征大舉必不克迅致膚功此人事也即天也至若晴
暘以時靈泉表異水草應候百靈效祥旋師之先甘雨
灑郊飲至之日雲陰開霽臣僚擁道恭迎都人父老孺
子辨香欣躍凱樂慶成臣推本於天之義由茲益自信
焉臣不任榮幸歡忭之至

獻平滇雅表

陳廷敬

臣廷敬嘗誦詩見大小雅六月采芑江漢常武諸篇什
皆言周宣王南征北伐興治撥亂以定四方平天下之
功臣嘗竊嘆以為如詩所載可謂盛哉後讀柳宗元平
淮雅表言宣王之形容與其輔佐由今望之若神人然
此直以雅之故也臣按宗元意以謂宣王定四方平天
下苟非其臣尹吉甫召穆公輩作為雅詩傳之於今今
雖欲望宣王之形容及其輔佐之盛其道無從而宣王

定四方平天下之功亦不能赫赫必傳於後世鳴虜宣
王之功世既罕匹而有及焉與過之又無有尹吉甫召
穆公其人者播為聲詩彰大其道如宗元所言鏗鉤炳
耀盪人耳目者其何以昭宣治蹟丕揚武功傳之無極
然則雅之作厥義綦重矣歟臣伏見

皇上文武神聖天錫智勇光宅天下奠安八荒仁威所
加率土內外罔不讐服乃有孽臣潛伏伺釁煽搆逆亂
震搖我疆圉倣擾我人民

皇上赫然一怒命將授鉞頃年以來定秦隴降閩海平
兩粵收巴蜀天兵所嚮次第告捷而滇逆竊據南楚實
為亂首

皇上神機中斷指授規模掃清湖湘進克黔南破堅摧
險直薄滇城之下師久不解於是

睿旨督進金鼓一動震蕩妖氛皆由

廟堂動罔遺策是以疆場舉必有功海外怖駭臣黎懽
踴太平之會適當今日臣嘗計滇逆之作亂干誅也耗

靡賦帑私籍甲兵招納亡命擅行威福尾大不掉反勢
已成正如漢削七國唐縱藩鎮早發則易圖優容則難
拔故三藩之事

聖慮先覺不辭大創之勞永奠萬年之治即推較宣王
之盛績殆謂過之矧漢唐之遺事哉而大雅不作臣竊
恧焉顧念朝臣至多豈無尹吉甫召穆公其人者譔為
雅詩薦之會朝燕饗施之於後用以颺

大清之盛美於無窮臣獨何人敢專斯事臣又念寵光

下逮最為優異而其官職尤在文章不得以能薄材譾
不足以自效為解謹撰平滇雅三篇再拜以獻臣廷敬
誠惶誠恐稽首頓首謹言

皇清文穎卷一

欽定四庫全書舊要卷一萬九千四百三

集部

皇清文穎卷二

表

恭進

御書點翰堂法帖表

陳廷敬

臣
廷敬伏蒙

聖恩

賜臣

御書恭摹上石因

賜臣點翰堂名并曰

賜臣點翰堂法帖臣廷敬謹奉

表上

進者伏以

玉殿披書麗

乾文而絢采

瑤池染翰炳

睿藻以騰輝

寶墨長新開萬世光天之治

御題載錫愜九霄捧日之心襲以縹緗珍逾璫璵之貴
壽諸金石光同雲漢為昭惟銜感其彌殷實賡颺而莫
罄臣廷敬誠惶誠恐稽首頓首上言竊惟自古書契之
興肇始聖神之代義皇宣龍書之妙蘊軒轅窺鳥跡以
成文岵嶁之穹碑蟲魚僅辨岐陽之獵鼓科斗猶存秦
漢則篆籀居多魏晉而隸楷斯著貞觀致治臨池聆御

府之章景祐承平飛白懸玉堂之署顧或藝池傳播未
云斧藻煒煌惟

聖主之建臨乃大文之魏煥茲蓋伏遇

皇帝陛下

德懋乾行

勲高皇古

璇宮侍養特隆溫清之儀

玉輅巡行數下蠲除之詔銘

豐功於瀚海備誌夫龍輜豹略虎旅鷹揚灑

麗藻於杏壇遠軼乎李碣韓碑皮文揚記圖成耕織民
隱悉於毫縑學究典墳微言闡於濂洛巍巍

帝德文軌通荒朔之區洋洋

聖謨黼黻備典謨之載更於

萬幾之暇時勤八體之工

手握璣衡運星辰於楮上

體符造化霏雨露於毫端字字正心不假誠懸之對行

行主敬直逾明道之書固已瓊檢牙籤藏諸

秘府抑復霞綃綺軸賚及班行何幸

微臣

得膺異數

講筵宣賜勒琰琬以成編

禁籞趨蹌荷琳琅之屢錫鮫人練素驚看龍爪之飛魚
子戔紅蹙就鱗文之色或剡藤滿幅標赤城十丈之霞
或側理橫書琢崑岡盈寸之玉或布芝英於扇上仁風
與甘露偕來或蔚雲氣於卷中墨彩共爐煙相繞或堂
額三字晴暉映玉璽之紅或門榜雙題晝暖耀龍紋之

碧或情怡往牒唐詩宋簡紛綸瑤管之餘或製自

宸衷水色山光掩映采旂之外風格間臨乎米董神姿
高掩乎鍾王

后德出聖而入神故

心畫經天而緯地誠新月高峯之盡致而一波三折之
兼工也臣廷敬袖裏驪珠奚止蘇軾千金之賜戩邊戈
法無待世南半字之成顧玉簡琅函

恩霑於

帝座而赤文綠字光耀於人間敢拭烏几以臨摹祇泐
青珉而流播啓芸笈則奎明斗燦陋彼寶晉齋中拂螭
版而璧潤珠圓不數太清樓下謹弁嘉名於卷首永傳
鴻寶於寰中邁澗桑樞窺嶽峙淵渟之筆深山環海睹
卿雲糾縵之輝臣廷敬柿葉空臨蕉庵未學右文典重
荷囊嘗直螭坳稽古榮深

點翰叨頒象管堂楹瞻竦常浮菡萏紅雲貝石飛騰時
見霑濡墨雨恭綴蕪詞於後恪呈

黼座之前惟勉葵藿之蓋忱冀報涓埃於萬一伏願

堯天永冒

舜日長華

壽考萬年奠金甌於孔固

本支百世縣玉厯於無疆搜意象於簡編既列左圖右
史

勅亮工於寮署務俾大法小廉赤雀銜書彌著弘文之
盛黃虹表瑞常徵有道之祥矣臣無任瞻



天仰

聖激切屏營之至謹以

御書點翰堂法帖裝潢成帙隨

表上

進以

聞

進呈

御選古文淵鑒表

徐乾學

管理修書總裁事務原任刑部尚書今給假回籍臣徐乾學誠惶誠恐稽首頓首

上言伏以運啓文明式煥圖書之色道隆述作載垂琬琰之華維論著實繁於衆流而折衷悉由乎

睿斷固足經緯天地協和邦家輝映山川光華日月者也臣誠惶誠恐稽首頓首粵稽書契之興肇自鴻濛之

始義文頡迹乃見權輿夏誥殷盤遂多制作紛綸六藝
實為載道之書流行百家彌廣立言之旨指歸既別體
製斯殊托始周秦之時以及元明之代累朝所積四庫
稱多秘府所藏千秋特盛然而中區純駁辨介毫芒酌
水別其澠淄聞音察乎宮角要無乖於義理庶各暢其
條流歎夫蘭陵首編雕蟲遺議逮至華林繼輯買璞蒙
譏辭句亦有純疵風氣不無升降若乃陶鈞萬彙開造
化之洪鑪翦截羣言提文章之玉尺自非經

聖神之閎覽何由成簡策之偉觀伏遇

皇帝陛下堯文炳煥禹律鏗鏘披綠帙之高詞萬籟並
錄搜紫臺之秘典乙夜忘疲允矣敦敏之性成共仰聰
明之天縱珠毫乍染同九經之不刊瑤札旋題傳百世
以為寶固已昭回雲漢輝麗星辰上耀三霄下飾庶物
以故家知墳索被榮光之煒煌戶習猗那沐慶雲之葩
郁乃猶於

萬幾暇晷覃思藝文百氏遺編咸歸品藻務嚴決擇用

法來茲盡收蘭臺石室之藏兼採蠹簡竹書之記掎摭得失勾校錙銖手自丹黃親加甲乙金壺霏潤縈煙霧以裁縑瑤管春容繞龍鸞而拂素盡刪瑕類悉採菁英體或別於員方義同歸於典則網羅大備可廢九流七略之篇囊括無遺允為冊府詞林之秘復命臣等補加箋註再行校讐正故牘之乖訛先求依據增遺文之脫漏必務該詳然後各冠

御評

賜名淵鑒譬涵衆川之廣若照庶品之形懸日月以為
昭樹津梁而永濟微言共揭輿旨常新臣學殖庸虛性
識椎魯鈎沈決滯慚經學之空疎起例發凡愧史才之
融貫篇題東壁叨沐

恩榮筆札西清親承商榷伏蒙

詔旨敢不竭其編摩仰稟

高深得稍窺夫條彙排理既竣次第進

呈伏願瑞應疇圖祥開象緯風馳化偃八方霑稽古之

榮日鏡天臨九服享同文之治臣等無任瞻

天仰

聖激切屏營之至謹以校過

御選古文淵鑒正集八十卷別集二十六卷外集八卷
隨

表上

進以

聞

恭進

大清會典表

徐乾學

臣某等誠惶誠恐稽首頓首上言伏以
經綸懋建八方開大治之風

謨烈為昭萬世垂不刊之典維

神聖之規模悉備斯臣民之法守聿新彪炳前休煒煌
來範粵自

太祖高皇帝開乾闥坤首定大業

太宗文皇帝立綱陳紀嗣建鴻圖

世祖章皇帝混合車書順九垓而同軌整齊品式釐百度以惟貞潤色奠太平之基文經武緯黼黻際休隆之會禮備樂明迨夫因革損益之宜一切制度云為之迹擬虞廷之亮采布在九官若周禮之分曹詳於六職允矣有倫而有脊粲然是訓而是行但法久則弊生科條期於畫一或時移則俗易規制適於變通是惟酌古以宜今庶幾遠遵而近守垂諸簡策播在章程當文明極

盛之時正制作開先之日殷循湯典寶弘璧於琅函夏
績禹功奉和鈞於王府斷方員者仰規矩視曲直者資
準繩國是攸關朝章斯屬此蓋伏遇

皇帝陛下得一凝圖登三建緒調元丹扆備至德於先
天後天敷政瑤階勤萬幾於一日二日量衡律度考五
服而攸同食貨賓師稽八政而咸敘

聖人作而萬物覩

皇極建而庶民從顧以道一風同上本

列朝之積累自此披圖訪典下貽奕禩之儀刑

特敕纂修用開館局編年繫事既本立而末該起例發凡亦部分而門別至於析異從同精莫分乎銖黍去非即是辨或介於毫釐每仰稟於

睿裁輒受成於

宸斷躬逢堯舜知二典之非空言親見羲軒有三墳以明大道載經歲月始竣編摩允為

盛世之全書用裕後昆之令軌臣等學無根柢才愧庸

虛麤窺太史之遺文詎識

中朝之故事懷鉛握槧分昭回雲漢之光質義摛詞仰藻麗龍鸞之采謹完卷帙莫贊

高深伏願益懋升猷弘開泰運世緜璿歷監成憲以無愆代啓寶符學古訓而有獲臣等無任瞻

天仰

聖激切屏營之至謹以所修會典若干卷隨

表上

進以

聞

進朱子全書表

李光地

茲者伏蒙

皇帝陛下命臣等編校

御纂朱子全書總六十六卷刊刻已竣謹裝潢成帙進
呈臣等誠惶誠恐稽首頓首上言伏以

道光載籍統承四子之傳

德備文明象應五星之聚非為一時而出樂有後聖之
知果不虛行殆同親炙蓋繼天出治職無總乎君師而

稽古右文功乃隆夫作述五百歲之遙源斯在二千年之丕緒聿新臣等竊惟危微心法肇自伊耆終始大成集維元聖中間言天言性者則有禹臯成湯言德言學者乃由阿衡傳說丹書垂乎敬義周禮著夫中和逮洙泗而發揮無餘歷漢唐而明昧相半直至濂溪默契道體親授二程爰得考亭剖析精言兼綜諸子斯文賴以不墜後學由此弗迷然其道湮鬱於江沱惟其書流行於海內前代雖頒行學校知德者稀全編則剝蝕經坊

研精實寡從未有紹其道傳其心典極累朝尊異之隆
文經乙夜校讐之久如

今日者欽惟

皇帝陛下

心畫義爰

身符夏度

功巍文煥猶兢兢業業以勅幾
仁熟義精方矻矻孜孜而論道

謂朱子為諸儒之醇粹不難以聖而下學於賢故其書為六籍之津梁將俾沿河而東至於海崇其禮秩方自庶以升堂薈其遺編乃命官而授簡發凡起例無非稟聖心之裁成提要刊繁逐一經

御筆之刪定雖至微文碎義周覽甚詳轉注諧聲摩求必當冱寒蒸暑未嘗輟誦於萬幾之餘夜漏晨壺不聞停披於寸晷之暫是用規模畫一條理分明自小學大學以開端漸及四書六藝合道德性命而一貫極於聖

統王功文約而彌該義備而不複權衡取舍必得其肯
綮之精次第後先一準於施為之序歷選六百年來編
朱子書者其得詳略輕重之中誠未有如我

皇上者也非夫心心相繼不隔絲毫聖聖相承如合符
節孰能與此哉加以

親製序文冠諸書首大義微言之秘啓發靡遺修身覺
世之方會歸一致於是頒諸宇內使儒林有入聖之階
梯布在學宮凡來者得窮經之指要教思若風行而雨

化僊志自谷應而鐘鳴臣等章句習深經籍道邈生逢
堯舜尚慙比戶之民少學魯鄒誰是及門之士纂言不
如韓愈惟荷訓誨以成編校書遠遜更生幸藉指撝而
識字身遊道化之盛奮而忘愚名掛典冊之端榮以為
愧臣等無任瞻

天仰

聖激切屏營之至謹奉

表隨

進以

聞

恭進

大清饒歌鼓吹樂章表

高士奇

康熙二十年十二月二十日臣士奇誠惶誠恐稽首頓首上言臣聞一人大聖武之昭無思不服萬物被時雍之化有感必宣故蟲豸微吟亦助天心之豫順而芻蕘畢獻聿徵王道之蕩平懷堯德而難名惟覩赤文成象覩虞廷之振旅敢忘朱鷺升歌恭遇

皇帝陛下武膺圖上蒼眷命跨九州而無外乘六龍

而建中文武聖神巍巍者廣運之德狗齋敦敏疊疊者
敬躋之修孝奉

兩宮不異廚生蒲葦仁覃八表無慙苑有騶虞離照大
於中天豫順同於萬國固已橫今絕古煌煌玉燭之調
緯地經天奕奕金甌之鞏夫何封狼悖逆獬犬猖狂阻
彼河山犯我顏行遂使鯁憑鯨勢風生珠海之濤蜮受
鬼驅氣暗劍津之浦楚江南去徹夜烽烟蜀道西來終
年羽檄肆

天威之赫怒命我六師屬上帥以誕將靖茲三孽七閩
迅掃既窮狡兔之謀百粵長驅遂翦乳虎之翼於是涸
車前之鮒取井底之蛙望金馬以揚旌拍碧雞而命衆
人蓄頻年之憤誓不與之俱生士無再舉之勞滅此而
後朝食有扈之惡盈貫莫追青萍防風之骨專車終膏
黃鉞渠魁殲而衆志定羣醜罹而遠人懷露布自萬里
遙飛喜動

龍顏之日天道值一陽來復祥流黍谷之春百蠻稽首

以來王四海傾心而慕化擴再造之堯封益覩時和道
泰陟無疆之禹跡載看海晏河清洵今古之隆規為皇
王之極軌臣蓬蘖賤士樗櫟庸材謬濫齊竽愧乏鷹鷂
之逐徒含趙穎未知鶩鶴之形然飽德而遊康衢難忘
帝力傾誠而向化日莫罄愚衷冀鳴休豫於
熙朝用布謳吟於巴里敬效前代樂府撰為
大清鐃歌鼓吹辭九章進呈

御覽夫宣之鉦鐃豈有芭薇江漢之工而被之管絃聊

隨籥雅歌幽之末於以敷揚駿烈紀述鴻猷雖瑣瑣蠅
鳴無當元音之奏而鏘鏘獸舞彌懷因事之陳伏願安
益知危治不忘亂聞鼓鼙而思將帥時深楊柳雨雪之
情當昌盛而做無虞聿進梧桐鳳凰之咏則華平獻瑞
羞稱寶鼎芝房而青鸛來鳴不數栢梁天馬矣臣無任
激切屏營之至謹奉

表隨

進以

間

謝授館職表

勵杜訥

臣訥叨蒙

聖恩授翰林院編修謹奉表稱

謝者臣誠惶誠恐稽首頓首竊以

鰲禁風清宜慎端良之選

龍山地迴應推博雅之林

恩膏特渥於凡材拔擢遂超乎常格寵維踰分慙乃倍
增臣性本顓愚資尤譎薄雞壇藝圃未探丘索之遺蠹

測管窺莫挾典墳之奧是以章縫久曳興歌鳴鹿以懷
慙及乎芸閣宏開

詔試雕蟲而色喜衡茅下士儼載筆於石渠金匱之間
鉛槧微勞得附名於瑤冊瑤函之末已屬三生厚幸復
叨一命榮施行將鞅掌以終身願矢葵誠而自效若夫
甘泉供奉真如仰企雲霄至於玉署優除豈敢形諸夢
寐茲蓋伏遇

皇帝陛下

智協重華

仁符廣運

功崇典學歷寒暑以不渝

志切右文遇非葑而弗棄弓旌賁於山澤可謂野無留
良車服盛於

朝堂共羨王多吉士如臣者自維陋質僅同樗櫟之材
幸際昌辰敢墜蓬麻之志欽承

隆眷留侍

內廷

奎畫宸章時仰瞻於

黼座金莖玉饌長拜賜於

經帷

天語承宣袖拂紅雲親

鳳宸仙臺侍宴身依紫極近

龍顏洵為不世之榮夫豈尋常之遇星霜數易未効尺
寸之長

雨露頻垂正切冰淵之慮忽

頒新命實媿汗以難承更署清班益驚皇而莫措思燃
藜於秘府既非視草之才擬委珮於麟臺更忝編摩之
任懷鵜梁而滋懼顧螽負以何堪縱效涓埃難酬

高厚伏願

旁求俊乂

廣納真儒

器使因才曠觀於牝牡驪黃之外

官方論辨務嚴乎燕石魚目之分庶翼為明聽之休風
比隆於往古萑葦雖偕之盛事再見於今茲矣臣無任
感

天荷

聖激切屏營之至

恭進明史表

張廷玉

伏以

瑤圖應運丹綸繡竹素之遺

雒鼎凝庠玉局理汗青之業集百年之定論裒一代之
舊聞厯纂輯於

興朝畢校讐於茲日垂光冊府煥采書林竊惟論道首
在尊經紀事必歸攬史興衰有自七十二君之蹟何稱
法戒攸關二十一史之編具在繼咸五登三之治心源

不隔於邃初開萬方一統之模典制必參諸近世況乎
歲時縣歷載籍叢殘執簡相先合衆長而始定含毫能
斷昭公道以無私考獻徵文用備西山之秘屬辭比事
上塵

乙夜之觀欽惟

皇帝陛下

乘六御天

奉三出治

紹庭建極綏蕩平正直之猷
典學傳心綜忠敬質文之統
觀人文以化天下鑑物惟公

考禮樂以等百王折衷必當惟茲明史職在儒臣紀統
二百餘年傳世十有六帝創業守成之略卓乎可觀典
章文物之規燦然大備迨乎繼世法弗飭於廟堂降及
末流權或移於閹寺無治人以行治法既外釁而內訌
因災氛以啓寇氛亦文衰而武弊朝綱不振

天眷既有所歸賊燄方張明祚遂終其運我

國家丕承景命肇建隆基天戈指而掃欃槍王會圖而
陳玉帛滌中原寇盜之孽奠我民生慰前朝諸帝之心
雪其國恥迄今通侯備恪俎豆相承依然守戶衛陵松
楸勿翦是則擴

隆恩於覆載既極優崇因之徵故籍於春秋絕無忌諱
第以長編汗漫抑且雜記舛訛靖難從亡傳聞互異追
尊議禮聚訟紛拏降及國本之危疑釀為要典之決裂

兵符四出功罪難明黨論相尋貞邪易貿稗官野錄大都荒誕無稽家傳碑銘亦復浮夸失實欲以信今而傳後允資博考而旁參仰惟

聖祖仁皇帝搜圖書於金石羅耆俊於山林創事編摩寬其歲月我

世宗憲皇帝重申公慎之旨載詳討論之功臣等於時奉

勅充總裁官率同纂修諸臣開館排緝聚官私之紀載

核新舊之見聞籤帙雖多抵牾互見惟舊臣王鴻緒史稿經名人三十載之用心進在

彤闥頒來秘閣首尾略具事實頗詳在昔漢書取裁於馬遷唐書起本於劉昫苟是非之不謬詎因襲之為嫌爰即成編用為初稿發凡起例首尚謹嚴据事直書要歸忠厚曰紀曰志曰表曰傳悉仍前史之體裁或詳或略或合或分務覈當時之心跡文期共喻掃艱深鄙穢之言事必可稽黜荒誕奇袤之說十有五年之內幾經

同事遷流三百餘卷之書以次隨時告竣勝國君臣之
靈爽實式憑之累朝興替之事端庶幾備矣臣等才謝
宏通學慚淹貫幸際

右文之代獲尚論於先民敢云稽古之勤遠希風於作
者恭蒙

睿鑒俾授梓人伏願

金鏡高懸

璇樞廣運

參觀往跡考證得失之源

懋建鴻猷昭示張弛之度無怠無荒而熙庶績化阜虞
絃克寬克仁而信兆民時存殷鑒則冠百王而首出因
革可徵百世之常邁千禩以前驅政教遠追千古而上
矣謹將纂成本紀二十四卷志七十五卷表十三卷列
傳二百二十卷目錄四卷共三百三十六卷刊刻告成
裝成一十二函謹奉

表隨

進以

聞



皇清文穎卷二



總校官庶吉士 臣 張能照

校對官檢討 臣 郭 寅

騰錄監生 臣 陳 熙